



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

Pakistan nunger nuclear hadir ya IAEA-i mita repringtsüla: Rajnath

Neeraj Chopra May 23 nü Poland nung tokteptsü



VOL. XXII ISSUE NO. 211 (ADOK 211)

DIMAPUR

ROGONÜ (FRIDAY)

MONUPII (MAY) 16, 2025

₹ 5.00

Naga nunger wako ka kübok lungjemtsüla: The Naga Rising

Dimapur, Monupii/May 15 (TYO): Naga nunger rongnung telungjem aser jungshitepba bhukuma onok nokdaka lir. Ajaki 75th Naga Plebiscite Day amungtsü asoshi The Naga Plebiscite Commission inyakyim ya ka kuma lungjemtsü ayongzükba lir, koba Naga nunger aliba tesem ajunga nung amungtsüla, ta The Naga Rising ajanga 75th Naga Plebiscite Day (May 16, 2025) nungtem nung ayongzük.

Naga nunger wako ka kübok lungjemtsü aser asen lima aser nüburtem madak Tsüngrem tashi aser lenisüba aliba agizüktetsü asoshi iba maongka ya kanga

tajung lir.

Asenok tsüngta telemsa liaka, timtema mapang talangka liyonga aruaka asernok ajak taginüba ka lir ta asenoki angatettsüla. Naga National Movement nung telemsa adoker ojang dang alitsüla. Asen taginüba nung asenok ajak ka ama alitsüla, ta The Naga Rising ajanga ashi.

75th Naga Plebiscite küm ya Naga nunger asoshi Tsüngremi nangzükba atalokba mapang südakjang aser nüburtemi iba nukla tanaben agia asen temeden daki anitsü asoshi telungjem ola ngudakjang ta sarasademtsür, ta sangdong ajangasa ashi.

COFFEX ISTANBUL EXPO 2025 nung Nagaland nungi shilem agi

Dimapur, Monupii/May 15 (TYO): Nagaland indang coffees jenjang ajungkettsü Department of Land Resources, Nagaland mangdang nung Advisor, Land Resources Department, Nagaland, G. Ikuto Zhimomi-i anir züngsem toku aliba delegation ka May 9-11, 2025 anogotem Istanbul, Turkey nung COFFEX ISTANBUL EXPO 2025 nung shilem agia liasü.

Advisor den külemi Kevekha Kevin Zehol, NCS, former Commissioner & Secretary, Land Resources aser Hekato N, Additional Director, Land Resources aser Nagaland nungi coffee entrepreneurs pongu - Nagaland Coffee, Été Coffee, Juro Coffee, YES Coffee & Coffee Lady oa shilem agia liasü.

Iba sentong nung Coffee Board of India aser Government of Turkey tsüngta sendaktepba nung Consulate General of India in Istanbul, Mijito Vinito Chishi-i tongti shilem agiba ajanga

Nagaland delegation iba sentong nung kanga junga shilem agia liasü.

COFFEX ISTANBUL ya premier international trade fair aser Middle East nung coffee aser sendaktepa aliba industry tem temaba jenjangi ajungketba sapang ka amai lir, koba ajanga coffee jangrar aser professionals tem lungjemdaksür.

Coffee lu ayimba, processing aser marketing indang shisatsü tali arangshitsü aser alima yimyatem aser market tesendaktep tali awaloka metettsü asoshi state nungi iba sentong nung dena liasü.

Asemnü iba sentong agiba mapang Nagaland nungi aortemi cupping sessions, workshops aser coffee value chain nung international stakeholders den sensaksema coffee tabu balala tali jangja market yimya angateta, consumer temi sapuba aser jenjang atetba tasa, cutting-edge technologies amala angazük,

Gari lendong nung college azünger ana asü, ana yiru

Dimapur, Monupii/May 15 (TYO): Brehostibarnep Tsiesepu, Old Chümoukedima Heritage village nung Bolero gari ka len kübok leni feet 500 shi mezüzüka aluba gari lendong ka nung yangji mena aliba college azünger ana asü aser ana yiru, ta police osang ka ajanga ashi.

Bolero gari ka nung nisung pezü ya mener len kübokleni mekazüka alu aser nisung ana ya yangji asü ta ashir.

Iba lendong nung asür ana ya Akamu N. Shohe aser Zayisito Zeliang ta jangjatetogo aser tenaprong Sakus Mission College, Dimapur nung 6th semester azünger ta jangjaogo, ta Traffic Police sangdong ka ajanga ashi.

Yirur aliba nisung ana ya ka Sakus Mission College, Dimapur nung 6th semester azünger Chingong Phom aser ka Unity College, Dimapur nung MA azünger Kihomong ta jangjaogo.

Iba lendong nung yiruba nisung ana ya Christian Institute of Health Sciences and Research

(Referral) Hospital nung temang anepaluba mapang lir aser Chingong yabo kumzüksü teimla kangabo mali ama ashir.

Traffic Police osang ajanga ashiba agi, iba lendong ajuruba college azünger kaketshir tebur pezü ya arishi küm 20 tema aser Dimapur nung private hostel ka nung lia azünger liasü.

Tang tashi iba lendong kechi ajanga atalokar ano mejangja aser police temi bushisüngdangba mapang lir.

Kasa mapang Chümoukedima district administration ajanga nüburtem dang Chümoukedima Town (Old Check Gate) nungi New Chümoukedima via Old Chümoukedima Village tsüngta lenmang teyangludak aliba maparen metembang tashi iba lenmang nung gari kata mesenzüi alitsü metetdaksüogo.

Iba lenmang yangluba nung amshiba gari kisung senzüsü melatsü. Senzüsemponger ajungai iba tenokdangba sülen anidaka senzüsempongtsü ayongzüker, ta sangdong ajangasa ashi.

Chief Secretary lenisüba nung AHOds & HoDs senden amen



Nagaland Chief Secretary, Dr. J. Alam, IAS lenisüba kübok Administrative Head of Departments (AHOds) aser Head of Departments (HoDs) senden amendang tangokba noksa nung angur.

Dimapur, Monupii/May 15 (TYO): Nagaland Chief Secretary, Dr. J. Alam, IAS lenisüba kübok Administrative Head of Departments (AHOds) aser Head of Departments (HoDs) senden May 15, 2025 nü Secretariat Conference Hall nung mena liasü.

Secretariat nung Office Attendance lepa repringshia senden tenzük aser Department of Information Technology & Communication ajanga iba onük nung presentation ka agüja liasü.

Office attendance dak sendakba nung totuyuba agütsüba sülen tajungba kumogo, saka ano melenshitsü lir, ta Chief Secretary-i ashi.

Paisa maneni taoba mapang mapa nunglokja aliba ketdangsür aser AHOds aser HoDs ajunga dang pei office nung attendance kanga junga mittsü nenshia ashi.

P&AR Department ajanga tawa agütsüba Notifications/

Office memoranda (OMs) nung presentations asem agütsü, mezüngbuba ya Periodic Review of Government Servants for premature retirement under Rule 56(j) of FR dak sendakba OM liasü.

Tanabuba ya Policy of Short Term Workers aser tasembuba ya The Sexual Harassment of Women at Workplace (Prevention, Prohibition and Redressal) Act, 2013 kübok Departments aser Bodies ajunga nung Internal Complaints Committees (ICC) amenoktsüba indang liasü.

Chief Secretary ajanga lokti dang item policy mapa kuma amshiba indang otsü lemsatop aser AHOds ajunga dang item Oms nung aliba ama inyaksü ajungshia liasü.

Pai iba senden nung aliba sorkar ketdangsür ajunga dang nüngdakba mapang P&AR Department nungi jangjateptsü

ayongzüka liasü. ICC dak sendakba nung pai HoDs/AHOds ajunga dang She-Box atema nodal officer ka shimtsü mepishi.

Chief Secretary Dr. J. Alam-i House dang Nagaland Rules of Executive Business, 2020 sülen kanga kumdanga aser junga anidaksü ajungshia liasü.

Bendanglen nungi tongtipang nisung arurtem nem akhum agüja State-i official Lunches/ Dinners ayongzükba nung ketdangsürtem adentsü kanga tongtipang lir, ta pai senden nung metetdaksü.

ACS & Finance Commissioner-i Government Departments ajunga dang pei office nung pre-paid electricity meters inoktsü ayongzüka liasü aser budget yanglua aliba ama indoktsü asoshi senotsü sanction bushiba nung memonutsü pai House dang metetdaksü aser mendenpubai melepzüng o jembia senden tembang liasü.

'integrated farming' indang shisatokden ayongzük

Mokokchung, 15 May (TYO): Nationalist Democratic Progressive Party (NDPP) Mokokchung Region kübok Agri & Allied Organization-i aluyimba (integrated farming) dak sentakba nung shisatokden sentong ka parnok office nung ayongzüka kaogo. Iba sentong nung Mokokchung Region kübok constituency 10 nungi party pur parnok 50 dak tali arua aden.

Sentong nung NDPP Mokokchung Region Agri & Allied Organization Tir, Nüngsang Ao-i jembidang, iba sentong ya party pur tashi itta lungjema aotsü asoshi dang

masü tongtibangsa grass root nung alirtem tangar dak metaloka meli-i alu meranga ayimtsü, pei sasa tepok sünga alitsü aser iba ajanga asen lima rongsenketzüng jenjang ajungtsü nükjidong yur ayongba lir, ta metetdaksü.

Nübu tsüka training nungbo aden saka tangazükba kecha melira amajok dang asütsü, anungji, shisalen sayurtemi kechisa sayudir item tangazükbaji mapa kuma inyaksü merangang, ta pai ajungshia liasü.

Taoba mapangbo Agri & allied ya committee ka dang

liasü, saka ibai ajungkettsü tim ta angateta iba frontal organization ka kümdaksüogo. Talisa 2024 nungi iba frontal ya asendenshiba angur. Ibai tongtibang telen ka asünung, Mokokchung region kübok constituency koba nungsa unit tenteta maka, item nungji tenteta aotsü temulung agütsütsüla, ta NDPP Mokokchung Region Tir, Mangyang Jamir-i metetdaksü. Iba sentong ajanga asen lima temelenshi adoktsüsa shilem agirtemi kanga junga angazüker mapa akümtsü asoshi paisa ajungshia liasü.

(Maneni tapak 2 nung...)

Nagaland nung anogo ishika tzünglu maneni arutsü: NSDMA

Dimapur, Monupii/May 15 (TYO): Nagaland State Disaster Management Authority (NSDMA) ajanga anogo ishika atema tzüngsang-mopung takzüba osang lemsatopogo.

Nagaland state kübok district ajunga nung May 15 nungi 21, 2025 tashi tzünglu tera arutsü aser mepet sübanga tzünglu arutsü aser district ajunga nung May 18, 2025 nü tzünglu tesashi

arutsü takzütera lir.

Tzünglu den külemi tesem kar nung tsüngi-tsüngperet alitsü akok. Iba mapang Nagaland nung aliba district ajunga nung tzünglu ya thia-thia arutsü imlar. Anungji iba mapang tsüngi-tsüngperet mesüra mopung tesashi nungi jenbua alitsü tongtipang aser kasa mapang communication aser tesendaktep balala nunga kongshitsü akok, ta NSDMA ajanga ashi.

Anungji NSDMA, Home Department ajanga nüburtem dang iba mapang lendong majurutsü asoshi saksalema alitsü ajungshir. Maneni District Disaster Management Authorities aser sendaktepa aliba department tem dang meyi mapang nüburtem aser ki o jen kumzüksü asoshi saksalema aser renema alitsü ayongzüker, ta NSDMA sangdong ajangasa ashi.

Dr.Sazo-i Yoriiba nung YWWS building semzüksü



Yoriiba nung May 15 nü YWWS building semzükba mapang Dr. Chotisuh Sazo aser tangartem tangokba noksa nung angur.

Kohima, Monupii/May 15 (TYO): Taoba mapang Nagaland Legislative Assembly (NLA) speaker Dr. Chotisuh Sazo-i May 15 nü Phek district nung Chozuba anasa Yoruba yimtsüing nung Yoriibami Women Welfare Society (YWWS) building semzüksüogo.

Ki tasen semzükba sentong nung o jembiba mapang Dr. Sazo-i ashiba agi, YWWS building ya ki ka yangluba dang masü saka iba ya tashi, temulungtetba aser terenlok temaitsü lir.

"Iba ki tasenba ya jara aser kilem dang masü saka timla aser empowerment tatishitsü südakjang," ta pai ashiba den, "iba ki ya tebilemdangba balala ainba, tasa aser sempettem wangshiba aser taküm melenshiba tesem ka südakjang," ta pai ashi.

Tetsürtem nem tashi agütsütsü, tangar dak memetaloki alitsü aser

tekübokba jenjang nungi lokti tashi itshidaksütsü atema mapang tajung inyakba atema Dr. Sazo-i YWWS nem tenüngsang agütsü.

Dr. Sazo-isa, yimden yimsüsüba, lokti tentet balala aser tamangba yimsü dak sendakba nung asür Vamuzo Phesao (former Chief Minister of Nagaland) densema lenirtem aika anitetba atema Yoriibami tsürtem nem tenüngsang agütsü.

"Tanü asen nokdaka aliba jenjang reprangdangra tetsürtem kanga renlokogo," ta pai ashiba den taoba mapang dang nungi tali tetsürtem school-i aoer aser temaba jenjang nung kaketshisatsü bushilokyonga odar, ta shisem.

Employment dak sendakba nung Dr. Sazo-i ashiba agi, tetsürtem entrepreneur aika kümдар aser parnoki rongsenketzüing nung kibongtem nongita arudar.

Lokti libaren nung tetsürtemi parnok ola adokdar aser ochiba atema nokdaka lokti libaren nung inyakyim melenshidar, ta pai ashi.

Local governance nunga telemtetba agiba nung tetsürtemi tali shilem agidar aser iba ajanga lokti renlokdahtsüdar, ta pai ashi.

"Lokti ajungkettsü atema tetsürtemi kanga tongtibang shilem agidar. Education nung tetsürtem ya tarutsü putu atema educators, mentors, aser advocates tem lir. Rongsenketzüing nung parnoki aluyimer, entrepreneurs, artisans, aser professionals tem ama teyari agütsüdar. Lokti terenlok ajak nung parnok mapang angur," ta Dr. Sazo-i ashi.

Sentong nung YWWS chairperson Kiivesetali Lohe-i salem osang lemsatep aser iba sentong ya Sayiniilli Nyekha lenisüba nung agia liasü.

B. Henok Buchem Kohima District Bharat Scouts & Guides tir kümogo

Dimapur, Monupii/May 15 (TYO): Kohima Deputy Commissioner, B. Henok Buchem, NCS Kohima District Bharat Scouts & Guides (BS&G) tir asütsü shimogo. Pa mapa nung aniokba sentong ya May 15 nü DC Office, Kohima nung agia liasü.

Sentong nung o jembiba mapang DC Buchem-i, class 8 nungi 10 tashi scout ama shilem agiba bilemtetshia jembia liasü. Paisa, BS&G nükjiding tajung aliba tenüing asangba den parnoki lanurtem mulung nung values, civic sense, aser life skills inoktsütsü atema shilem tajung agiba lemsatep.

"Kohima district ya 1870 küm amenok aser puti otsü kanga takar lir. Mezüingbuba district ama asenoki tatishitsü tajung sayua len anitsüla," ta pai ashi.

Paisa, ajak dang pei kidang nungi temelenshi tenzüksü ajungshiba den tesayur tajungtibaji asen kaketshir aser tanurtem asütsü akok- parnok dang lanu asüba mapang sayuang, ta shisem.

Kasa mapang nung State

Organising Commissioner (Guide) Vimezhonu-i Scouting and Guiding indang mettedaktsü. Lai, iba ya voluntary organization ka aser iba ajanga lanurtem yongtsü nung telungjem, discipline aser life skills ajungketer, ta ashi. Laisa, BS&G tamendakdak aser nükjidingtem indang aser iba den structure aser Scout/Guide temzüing ozüing indang mettedaktsü.

Sentong nung District Education Officer (DEO) Kohima, Emilo Patton-i Tsüingrem temaotsü meshizüka sarasadem aser iba sülen metetpela mapang tatsüka agi.

NSBSG State Secretary Thepfuzakie Angami lenisüba nung iba sentong agi aser pai Nagaland State Bharat Scouts & Guides (NSBSG) organizational hierarchy indang mettedaktsü. Pa lenisüba nungsa sensaksem agia liasü. Kasa mapang nung State Treasurer Neibou Sekhose-i pa tajangshiba lemsatep aser iba movement ajanga temelenshi bener arutsüba indang lemsatepa liasü.

Kohima DPDB senden amen; MLA Kevipodi mendenbuba kümogo

Dimapur, Monupii/May 15 (TYO): Ita shia amenba Kohima District Planning and Development Board (DPDB) sendem May 15 nü Deputy Commissioner, Kohima, B. Henok Buchem, NCS lenisüba nung DPDB Hall, Kohima nung menogo.

Senden nung mendenpurtem melentep aser MLA Kevipodi Sophie, DPDB mendenbuba tasenba ama pelashishia agizüka liasü.

Buchem-i, menden toktsüba mendenbuba MLA Dr. Tseilhoutuo Rhutso dang pa mapa tajung asoshi kanga pelaba lemsatep. Mendenbuba tasenba pelashishia agizüka DC-i, pa lenisüba nung maneni renloka aotsü imlaba lemsatepa liasü.

O jembiba mapang MLA Sophie-i, state sorkari pa dak tamang akaba atema pelaba lemsatepba den sorkar policy balala benoka inyakba mapang ketdangsürtem nem takokba tashi teyari agütsütsü nangzüka liasü. Paisa, ketdangsürtem dang nendaka aser ochishia inyaksü ayongzüka den terenlok maparen ajak nongita yaritsü tenangzüka agüja liasü.

Senden nungsa Kohima District kübok sorkar school tem rongnungi HSLC topper Riya Gupta nem tetushi agüja liasü. Riya ya GHS Chandmari nungi kaketshir ka aser lai la teyi tsüingsü nung anidaka iba tetushi agizükogo. Teyi-ia iba tetushi ya taoba küm agizüka liasü. Riya-i pelaba lemsatepba mapang tsüingrem, tesayur, tetsü aser la nongita yarir ajak dang kanga pelaba lemsatep. "Iba tetushi anguba atema ni kanga ajemaludaktsür aser tushia bilemer," ta lai ashi.

Senden nungsa board-i, GMS Daklane ya Government High School-i ajungkettsü sensak asem. DEO Kohima report dak



Kohima District kübok Government High Schools tem nungi HSLC topper Riya Gupta, nem Kohima DPDB senden nung tetushi agütsüba noksa nung angur.

ajemdaker tenüingdakba criteria ajak abensar asünung board-i iba ken o ya abentsü telemtetba agi.

Kasa mapang nung Tourist Officer Abigail Solo-i, Tourism Department inyakyim indang PowerPoint presentation ka agütsü. Lai, Kohima-i arua anenzükba alima penzürtem indang data lemsatepba den tang hotel 40 aser home stay 91-i mayimjemba indang lemsatep.

Laisa, 25buba Hornbill Festival, Khonoma nung Enopen Resort aser Services Block, Kohima View Point aser Aradura Hills trekking route, Chakhabama nung Dawn Chalet aser Jotsoma nung eco-tourism development indang mettedakja liasü.

Abigail-isa, tetsükdaktsütem kokteta aotsü atema tali tajungba sendaktepa inyaksü aser strategic support nüngdakba lemsatep. DC Buchem-ia, lenla kar nung tourist-friendly environment maliba indang lemsatepba den department dang skill development program tem ayongzüksü mepeshia mettedaktsü. Paisa, department indang websites mapangshia update süa alitsü nüngdakba lemsatepba den Kohima jila nung kilentsü raksar aliba yanglushitsü atema ken o dak sendaka aliba department ajungshia liasü.

'integrated farming' indang...

(TAPAK 1 NUNGI...)



Agri & Allied Organization NDPP Mokokchung Region-i ayongzüka 'training & workshop on integrated farming' sentong region office nung akaba mapang shisalen sayurtem den shilem agia adenertem noksa nung angur. Mokokchung, 15th May, 2025

Iba sentong nung shisalen sayur Lanuchuba Imchen, Inspector, DAO office Mokokchung-i 'integrated farming system (IFS)' onük nung jembidang, iba inyakyim ya shiruru balala, tsünüsembong, aonsotsü, mendi, tsük, ango/an/ninang metsüba, süngdonglidong, süngjanglijang aser tanga yayim (system) kobai kadi ka nem tajangzüik agütsür, item temeyoktep aluyimba maparen dang ajar, aser iba ajanga küm piyong aluyimer nem

teyari balala agütsür, ta ashi.

Paisa IFS model ya tapu balala lir, anungji, tapi agi masü asen lima kechi tajung akümer tzü mopung dak apet shima ayimtsüla, ta ashi. Paisa IFS nükjiding, ali tzü mopung nüngdakba, IFS dak keta aliba tenük-telen, IFS ayimba nung tajangzüik, tatishitsü dena tesayuba agütsü.

Recha Imchen, Asst. Horticulture Officer, Mokokchung-i mushroom cultivation dak sentakba nung - konger metsüba yimya balala,

koba mapang aonger, konger achiba ajanga temang nung teyari agütsüba, konger lu ayimba nung ngujem, tanü market nung nüburtemi konger chinüba, tzü mopung sütepba, aser konger lu yima takar akümba takok osang kar lemsatepa liasü.

Iba sentong nung C. Meren, Vice President (Agri & Allied Org.); I. Mayang Aier, General Secretary (Agri & Allied Org.); Sentikala, Secretary (Agri & Allied Org) parnokia shilem balala agia liasü.

Pakistan nunger nuclear hadir ya IAEA-i mita reprangtsüla: Rajnath



May 15, 2025 nü Union Defence Minister, Rajnath Singh-i Badami Bagh Cantonment semdangba mapang pai sepai ka nem nanglong agütsüba noksa nung angur. Operation Sindoor sülen tang mezüing pai Jammu and Kashmir semdang. Kasa noksa nung J-K Lt. Governor Manoj Sinha-a angur.

New Delhi, Monupii/May 15 (Agencies): Brihostibarnü Defence Minister, Rajnath Singh-i Jammu & Kashmir semdangogo; April 22 nü kiralongrartemi Pahalgam nung India nunger 26 khasetba sülen tang mezüing pai J&K semdang. security tensa asadangtsü aser arrtsülen sepaitem terenemshiba jenjang asadangtsü atema pai J&K semdang. Pa den J&K Lieutenant

Chhattisgarh nung Maoists telungpur 31 khaset

New Delhi, May 15 (Agencies): Tesüiba hopta asem tashi sepai 26,000-i Chhattisgarh-Telangana arrtsülen Maoists telungpurtem mita aoba mapang nung telungpur 31 tepset aser Maoists amenoka aliba Karreguttalu hills maakdokogo. 'Black Forest' ta ajaba operation ya May 11 nü tembangogo. Iba operation kübok sepaitemi People's Liberation Guerrilla Army (PLGA) Battalion 1, DKSZC, TSC, aser CRC indang headquarters aika maakogo. Iba operation ya arem tulu nung agi, ibayongji Central aser state sepaitemi Karreguttalu hills nungji helicopter anentsü atema helipad ka tama yanglua liasü. Bijapur nung osangbenertem den jembidang CRPF Director General, GP Singh-i, "CRPF den 450 aser chiyungtsü seret 12,000 ngutetogo," ta paisa metetdaksü. "Sepaitema 18 yiru aser parnok teimbaka IEDs apokba ajanga yiruba lir. Yirua alir ajakji linük nung aliba medical facilities tajungtiba nung yaridar. Tasü itta raraba atema ni Chhattisgarh Police, CRPF aser CoBRA Bn nem tenüngsang agütsür. Iba operation ajanga onoki telungpur junga amenoka aliba tesem ka atsüngogo. March 31, 2026 tashi nung Maoists samatsütsü mission nükjidong yur inyaker," ta paisa shisem. Black Forest operation atema tenüngsang agüjang Union Home Minister Amit Shah-ia X ajanga, "Kiralongra ajanga yimsüsüba hills nung tangbo nüma tanga linük wako songogo. Tanü tashi nung iba operation ya tulutiba asütsü," ta metetdaksü. "Iba tesem nung tenemtemji metre 965 talang tashi lir, lungki aika lir aser temperatures ji 45 degree celsius tashi atur. Onoki prangpong 35 ngutetogo, BGL shells 800 dak tali, prangpong yangluba unit pezü, IED bomb

Governor Manoj Sinha-a liasü. Singh-i sepaitem ajuru aser kiralongrartemi Pahalgam amakba sülen arrtsülen Pakistan den raradang asüba sepaitem nem akhüm agütsü. Badami Bagh Cantonment nung sepaitem den jembidang Rajnath Singh-i, Pakistan nungertemi nuclear amshitsü amokmerenba ajanga India metsübur, ta ashi. "Pakistan nunger nuclear hadirtem ya International Atomic Energy Agency (IAEA)-i mita reprangtsüla," ta Defence Minister-i ashi. "Ni alima dang tasingdangba ka asüngdang: khuret mabenba Pakistan ama linük ka ket nung nuclear hadirtem kümzüka ali asü?" ta pai asüngdang. "Operation Sindoor mapang nung tatalokbatem atema India nunger ajaki nüma atanger. Defence Minister ka ama aser India senso ka ama ni nenok dang pelaba lemsateptsü atema ni yagi aru," ta Rajnath Singh-i ashi. "Kiralongrartemi Pahalgam nung tai maket nisungtem dang parnok yimsü asüngdangba sülen khaset. Ibayongji asenoki kiralongrartem 'tia' repranga parnok tepset," ta pai ashi. Pahalgam amakba sülen Jammu & Kashmir nung alirtemi Pakistan aser kiralongrartem dang jashiba atema ni nenok nem tenüngsang agütsür, ta pai ashi. "Tsükchirtem samatsüba tashi metettsü atema ni yagi aru. Nenoki arrtsülen Pakistan nunger sepaitem aser parnok 'bunkers' raksatsüogo. Tsükchirtemi ibaji kodanga mamatoktsü ta ni bilemer," ta paisa metetdaksü. April 22 nü kiralongrartemi Pahalgam amakba sülen May 7 nü India sepaitemi Operation Sindoor kübok Pakistan nung kiralongrartem camps aser kiojen amak.

India-i UN dang TRF ya kiralongrar telok ta sangdongtsü mepishi

New Delhi, May 15 (Agencies): India-i United Nations (UN) ajurua The Resistance Front (TRF) telok ya kiralongrar telok, ta sangdongtsü atema mepishiogo. TRF ya tawa Jammu & Kashmir kübok Pahalgam amakba telok lir. Tang mezüing India-i UN aser kiralongra anemba teloktem dang TRF ya kiralongrar telok, ta sangdongtsü atema mepishir. "India nunger technical team ka tang New York-i oa lir. Tanü parnoki 1267 Sanctions Committee indang Monitoring Team aser UN nung züngsem linüktem ajuruogo. Parnokisa United Nations Office of Counter-Terrorism (UNOCT) aser Counter-Terrorism Committee Executive Directorate (CTED)-a ajurutsü," ta osang ka ajanga metetdaksü. India Foreign Secretary, Vikram Misri-i, April 22 nü Pahalgam amakba kiralongrartemji TRF lir ta metetdaksüogo. Iba telok ya Lashkar-e-Taiba indang front ka lir. TRF-i social media post ka ajanga Pahalgam amakba ya parnoki lir ta April 22 nü sangdong aser April 23 nü sangdonga liasü. Ajisüaka tesülen TRF-i Pahalgam amakertemji parnok masü, ta metetdaksü. Misri-i ashiba agi, Pahalgam amakbaji kanga mejungi amakba liasü, ta TRF lenirtemi jangjaba sülen ang parnoki 'Pahalgam amakbaji parnoki masü' ta metetdaksü. "Parnoki o meyipa agibaji shingaia mamanger," ta Misri-i ashi. 2023 küm December ita nung India-i UN dang, LeT aser Jaish-e-Mohammad kiralongrar teloktemi TRF ama telok tilatem ajanga inyaker, ta metetdakja liasü.



Prayagraj, May 15, 2025: Madhya Pradesh nung minister aser BJP lenir, Vijay Shah-i Colonel Sofia Qureshi anema jembiba atema Brihostibarnü Prayagraj, Uttar Pradesh nung Samajwadi Mahila Morcha züngsemtemi Shah anema longkak aitba noksa nung angur.



बैंक ऑफ बड़ौदा
Bank of Baroda
Baroda • Surat • Mumbai • Gandhinagar

DIMAPUR BRANCH
Nyamo Lotha Road (Church Road)
Dimapur- 797112, Nagaland,
Email: dimapu@bankofbaroda.com

GARI TAYOKTSÜ LIR
YUNGMEI KONYAK nem Bank of Baroda, Dimapur Branch-i senotsü teyari agüja aliba vehicle/Equipment aser sentsüh maotetba ajanga gari sota ayuba tayoktsü lir. Iba gari alitsü jangrartemi tsüngtong arua gari asadangtsü aser gari indang osang tejanga agütsü atema ken o dak sendaka aliba ketdangsur den tongteerateptetsü. Offer shiti den gari atema Earnest Money Deposit (EMD) ama sen **Rs. 42,800/- (Rupees Forty Two Thousand Eight Hundred Only)** refundable/adjustable Banker's Cheque/DD benoktsüla. Gari alitsü teblemba alirtemi gari atema offer letter sealed envelope ka nung **"Quotation for purchase of vehicle No. NL-07/CC-6843"** aser teküboklen shisema aliba gari tenüing zülur ketdangsur nem **16.06.2025** nü nikongtsütsü 4:00 ako tashi nungbo benoktsüla. Sealed quotations ya **16.06.2025** nü nikongtsütsü 5:00 ako nung Bank of Baroda, Dimapur Branch nung gari alitsü teblemba aliba nisungtem matsüngdang lapoktsü. Bid takok ngua asüri quotation lapokba anogo nungi tenzüker anogo 05 (pongu) tsüngda sen agütsütsüla mesüra Branch tekolakbai atakzütsüba mapang tashi nung benoktsüla, ajita mesüra pai deposit süa aliba EMD meyipa mangutsü aser garia yokadoktsü. Vehicle/Equipment ya Bank-i latetja aliba jenjang dang nungi tekübokba nung mayoktsü. Ken o dak sendakba nung tashi agüja aliba ketdangsur ket nung kuli kecha magütsür offer tem agizüktsü mesüra magizüktsü atema tashi lir. Gari ya mapang inyakba anogotem nung Bank inyaksangshia aliba mapang asangtetsü.

SL.No.	Vehicle Make and Description	Reserve Price
1	NISSAN MAGNITE MT XV (NL-07/CC-6843) Engine No.: B4DF424E051485 Chassis No.: MDHFBADD0P9108500 Year of Manufacture: 09/2023	Rs. 4,28,000/-

Date: 16.05.2025
Place: Dimapur

Branch Head
Bank of Baroda, Dimapur Branch



TIR YIMYIM YIMOBILEM (EDITORIAL)

DIMAPUR FRIDAY, MAY (MONUPII) 16, 2025

Naga nunger otsü tajung

Naga nunger yimten nüchiso asoshi raraba tongpang nung timtem tekangshi aser maksü ajuruba dang masü saka otsü tajunga aika lir aser item otsü tajungtem rongnung 1929 küm Simon Commission dang, kodang British nungertemi India toktsür odir, onok Naga limabo onoksasa yimsüsüa alitsüsa India den masü onok kija tokjang ta tezüluba nung agütsüba otsü ya mezüing Naga yimten nüchiso asoshi prangpong injang amshia masü saka pen amshia pei tetsü taso lima yimten nüchiso atema ola adokba otsü asütsü. Iba sülen, Naga National Council tenzüker külen British nungertemi India toktsü dang, Naga nunger yimten jenjang balaka nung toktsütsüsa kecha ken o marunungji, NNC nung mezüing tir Wb.T.Aliba lmti leniba nung 1947 küm August 14 nü Naga National Council-i Naga nunger yimten nüchiso sangdongba otsü ya Naga yimten otsü nung tongtibang ka lir. Atangji, alima kin shinga teyari maden ser Naga nungertemi peisasa yimten nüchiso sangdong nungji, ibaji mapa küma mouteti India yimten tashi agi amokbangtsü tenzüker, anungji ano 1951 küm May 16 nü NNC nung tir Wb.A.Z.Phizo leniba kübok Naga nungertemi mulungba yimten telatetba ka agitsü asoshi plebiscite ayongzüka agiba otsü ya tanü Naga yimten ken o jembiba nung tamendakdak onük kümogo. Aji oda, tanü tashi Naga nungertemi India temzüing kübok liaka, 1947 küm August 14 nü Naga yimten nüchiso nguogo ta sangdongba anogo ya küm shia Naga nungertemi Naga nunger yimten nüchiso anguba anogo ta züingshia amongba agi, Naga nungertemi rongnungsa petsaperong aika liaka, Naga yimten temeten otsü mesamadaktsüi Naga yimten nüchiso asoshi raraba tongpang maitsüi nokdaka lir. Iba jagi Naga nungertemi mulungjang nung Naga yimten nüchiso angutsüba teimla mesamai lir ta sayur. Iba teimla nung tanü Naga nunger India kübok melii nüchiso akaba kin balaka küma alitsü asoshi meyongnemtepba, Plebiscite, anogo 75 buba amonger. Atangji, 1951 küm tashi nung Naga nunger nisung maküm liasü. Aji oda, Naga lima nung gari lenmang mali aser gari lenmang alidaka gari nung senzütsüsa NNC dak tashi mali asü, anungji yim o yim na tsüingda lenmang tatsüba bushia tetsüing agi Naga lima tesem ajak tonga oagi nübortem ajurua Naga yimten nüchiso angutsüba temeten aser nübortemi iba tongpang nung shilem agitsü nüngdakbatem angatetdakja jajaba otsüji, tanü Naga nunger lanurtem asoshi yimten nung tashi angudak asütsü. Tanübo garia lir, mobile phone lir aser tesem ajaklen electric light-a lir, anungji linük tenzükertem, akhi ama, anibeleva mejajar. Aji oda, küm 75 jakdang Naga yimten nüchiso angutsüla ta nokdakertem temulungtetba aser tangatetbaji reprangdangra, tanü Naga yimten nüchiso asoshi raraba tongpang nung nokdakertem denbo medemdangtsüla masü. Tanübo Naga yimten nüchiso bushirtem ki tajung nung lia gari tajung mener jajar. Ashiko, iba jagi Naga yimten tebilemtsü ken o tatem küma telemtetba kati arua jembitsüba nung temulung magütsür asütsüa akok. Yimten nüchiso ya tangar yimten talenba kübok timtema melii pei lima pei yimten kübok pei sobaliba temzüing ozüing sademsadema amshitetsüsa aliba yimten jenjang ka latetba dang ashir. Ajisüaka, tang amai asenok yimten nüchiso bushirtemang takarba kümer, tatsük temekong, tani-tebelem aser aya-tzüra memeteti ayongayonga litepra, iba ama jenjang ka nung lia yimten nüchiso asoshi bendanga agüja inyaksübo shingaia meimlar. Pi Gandhi nunger takar chir, foreign degree ngur arua pei lima atongdangbo suit aser necktie ajak agizüka yur dhoti agir mechi ka mechir tetsüing agi nübortem den India yimten nüchiso angutsüba temeten indang jembia lokti sentongsa sentong ayongzüka akaba otsütem nungi asenoka tangazüktsü lir. Kasaji, asenoki ngua Nelson Mandela-bo tepuokdak lia pei tetsü taso lima yimten nüchiso asoshi rara. Item tangar nüchiso asoshi raraba yimya aser otsütemji kodang bilemdangdir, tanü asenok chuba ki ama nung lia foreign car nung mener arua Naga Independence Day aser Plebiscite anogo amongba ya mazümazür repranger. Aji oda, tanübo asenoki asen yimten nüchiso asoshi raraba yimya ya shitakba rarar masü saka jilushi aier amai ka dang kumadokogo. Atangji, tanü tensa Naga yimten nüchiso asoshi raraba otsü yabo tajungtazü masü. Yimten nüchiso asoshi yamaibo merarar !

OLEMSABANG

**Ao Rijui Achaayanga agiba
“Kaket Zülur Shisamolu”,
Rongchii 26, 2025**

Onük: Ao Oshi Tamentakdak aser Lirumedem.

~ Tejembir : Mr. I. Temjen Tzüdir

(Yashi adok nungi...)

Ano tamburisa ashiba agi, alemli Lungso putu nungsa parnok tsüingda jatepjaraba aser menüshishi tanü amai mali asü saka;

- * Tebur tsüingda jatepba; Oh hoi, oh hoi ta, patong patong ta aser tetsür tsüingda; tongli tongli, rali rali ta jatepa aruba otsü lir.
- * Ano menüshishiba tsütsü-a yamaisa liasü; Teburi “Oh Shim, shim, shim” ano khen khenbo mom, mom, mom” ta aser idangji, tetsüri “O-sak sak sak, o-sak sak sak” ta menüa ta jembia aru aser itemji asen oshioben nung tamentakdak jenjang ka asütsü. Saka tanü koma menüteper asenoki meteta lir.

Yangi alima nung mezüingbuba o jembiba zülua alibaji Lipok 1:3”, Tsüingremi ashi, “*Tesangwa Adokang....*” süra yamai jembibaji kechi oshi agi jembir alitsü ama asenokia bilemer...? Tsüingremi mezüing jembiba oshiji, pai pa oshi agi jembia aser ibaji melentepa/ meyipzüktepa arur Ao o nunga jembia aru aser tanü asenoka iba otsüoren nungjagi Laishiba aser kaketter balala nung zülua zünga jembiteper. Ano Lipok 10:31 nungji züingdangra “...pei pei kin oshi jembia liasü” ta angutsü. Süra asen tütsüteboutema kechi oshi jembia liasü ta aroka shisadangtsüa nüngdaker.

Süra tanü asenokia, asen tütsüteboutem Lungtrok Ongtrok aser Jungliyimti lima nungji kechi oshisa jembir alitsü amai bilemer? Parnok mapang jembiba otsü aser ken atenba ajanga angatetba agi parnoki Jungli aser Mongsen oshi anaprongla jembia sobaliba-a aruba ken aser otsü ajanga angateter. Ano asen tütsüteboutemi atenba ken nung aliba ojangtem ajak ya Mongsen oshi kija-a masü aser jungli oshi kija-a masü ta asüba ojangosü aika angur. Anungji itemjibo “keno oshi” tetezü ken indang oshi ta asenoki ashitsü akok.

1. Ao Oshi Tamentakdak: Otsüla aser oboula nunger Jungliyimti nungi arur tesem balala nung lia asen oshioben tejembibo jembia aruaka tanü ama zülü kecha maka talangka lir talisa 1878 nungi asen oshi ya zülü wadangi ai. Ano zülü wadangi iaka Dr. E. W. Clark aser tebuttsü tena koba zülujang (script) agitsü kanga shisadanga arur (Assamese/Hindi/Bengali/Urdu item rongnung ka agitsüa bilemdang südi?) asen nübur olaosü den apet Roman zülujang (Alphabet) agitsü Missionary-tem Mungdang Tura nung, Aenjeti 14, 1893 alidang lemtet. Saka yangjia ano “Üü” atema tebilemtsü liasü. Anungji Dr. Clark-i V zülü kübok tajento (dot) ka enoka “Ü” melena amshidang, saka iba jagia mabensatet nung Dr. Clark aser Missionary-temi German zülü **ümlaut** nungi asen Ao oshi asoshia “Üü” agizüka nüngdakba kaketenok ajak nung amshia aru. Kodang iba “Üü” ya asen oshi nung enoka amshi, asenbo ABCD zülujang metsürtenet (27) küma tanü tashi yamaji amshia arudagi, kechiaser tetenzük nungi asen oshi züludang “Üü” ya melira mabensa ta ajitet nung missionary-temi aji oda purapiteta amshiba ajanga asen oshioben tali tabensaba kümdaktsü. Kodang nungi asen oshi zülü wadangi ai, tetenzükdak nüburtemji Jungli oshi jembirtem asünung asen kaketenok ajak Jungli o nung zülua yamaji amshir. Hau, tang Aor rongnung Jungli o, Mongsen o, Changki o aser Nokpo oshi ta jembirtem lir. item ajak ya asen Aor oshi. Oshi kaji kodang tejembi dang jembidir melamela sama-a aotsü lenmang lir. Yamaji asen oshi tejembi dang jembia alidang Dr. Clark, tebuttsü Mary Mead aser Assamese nisung Gudhula Brown nungeri Süpongmeren teyari agia asen oshi ya renloktsü merang. Yamaji arur Molung nunger Edijungba, Süpongglemba, Aokilep aser Imnasama nungeri missionary-tem den yaritepa asen oshi renloka aoba otsü tejangja angutsü.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Panama nung Iran tsür Khristan kati tejenokdak bushir



Artemis Ghasemzadeh

May 15, 2025: Islam yimsü toktsür Khristan yimsü agizüker Iran tsür ka ita asem jungnüa Panama nung jenoka lir, ajisiüaka la nem lempzüksüba mapang atongtsü lia lai la jenoktsü atema linük kar teyari bushir, kechiyong la Iran-i tanaben meyipa yokra la reshikangshitsü, ta International Christian Concern (ICC)-i metetdaksü.

Arrshi küm 27, Artemis Ghasemzadeh-i June 7 tashi nungbo la tejenokdak tasen bushitsüla, kechiyong iba anogo tashi nungji la indang visa expire asütsü.

Ita ka tejaklen Ghasemzadeh aser tedi, Shahin nati Iran linük toktsür ajen. Tena mezüng Dubai-i aoba sülen Mexico-i ao. Iba nungjagi tenati nisung kar teyari agia United States telungi ia liasü.

Adianu anaji San Diego nung anogo pongunü pua ayuba sülen tena piladaksü. Ghasemzadeh den refugee kar Panama-i yok aser tedi, Shahin bo Houston nung aliba detention facility ka nung puok.

Tan hopta ICC den jembidang Ghasemzadeh-i, "Mezüngbo ni Texas-i anir aoer südi ta ni bilema liasü. Onok Panama-i anir aoer, ta jembia angashiba mapang nung 'Panama ji United States nung lir asü?' ta ni bilema liasü," ta metetdaksü.

Taküm February ita tatembanglen Panama nung aliba hotel ka nung osangbenertemi Iran nunger refugee temji ajurua liasü. Ghasemzadeh ita ka shi Darién Gap arem anasa aliba camp ka nung ali, iba sülen UNICEF teyari ajanga la Panama City-i anir ao.

Tang la Iran nungi Khristan kibong ana den külemi lidar. Mezüngbo parnok dang anogo 30 tsüngda linük toktsür oang ta tuyua liasü, ajisiüaka ano ita ana mapang agütsü.

Ghasemzadeh aser tedi nati U.S nung immigration policies meteta dang lir, ajisiüaka Iran nung Islam yimsü toktsür Khristan yimsü agizükertem kanga reshikangshiba ajanga tedi tenati Iran toktsür ajen.

Ghasemzadeh jena aoba osang angazükba sülen Iran police-i lar ki mita oa liasü.

Lai, "Iran nung tasodang nungi Khristan süra kecha masü, saka Islam yimsü toktsür Khristan yimsü agizükertembo kanga reshikangshir. Tenla ki tepor tajung aika lir. Na Muslim ka süra aser Khristan yimsü dangi meyipra nai timtem aika ajurutsü. Police-i na aputsü, kechiyong Islam yimsü toktsübaji linük atema majung," ta metetdaksü.

Iran nung tang tashi Armenia Khristantem, Assyria Khristantem aser Catholic Khristantem lir. Ajisiüaka iba linük nung anti-conversion ozüng tesashi lir, anungji Islam yimsü toktsür tanga yimsü dangi meyipra tepuokdak ayutsü mesüra tasüba temerenshia agütsütsü akok.

Tang Iran nung aliba Evin Jail nung Khristan aika puoka lir. Iba Jail nung meimchir temeden anema kanga inyaker.

New York, Mexico aser Colombia nung lawyer temi Ghasemzadeh den tanga refugee temji linük kar nem agizükdaktsütsü atema inyakdar.

Ghasemzadeh-i, "Ni Iran-i meyipa aotsü dang nungibo tasü ang asütsü," ta ashi.

ICC-i sorkar balala dang Ghasemzadeh atema teyari meshitsüdar aser alima danga lai tang ajangshiba timtem lemsateper.

Ghasemzadeh-i, "Ni pungmang tamajung pungmanger. Ni ozü jila mali, USA ya ozü linük masü aser ni jenoktsü atema linük mali. Ni kechi inyaktsüar memetet, ni kong alitsüar memetet. Ni kanga tsübua bilemer," ta ashi.

2015 küm Turkey nung Shahin-i Khrista agizüka liasü. Ghasemzadeh-i pa aiben semdangba mapang nung tedi adenba Arogo nungji tekülem kidangisa ao. Shahin-i la nem Laishiba ka agüja liasü aser lai Laishiba azüngba sülen 2022 küm laia Khrista agizüka liasü.

St Peter's Square nung mezüng jembidanga pai, "Nenok ajak den tesünep liang" ta metetdakja liasü.

Eastern Catholic Churches nungi züngsemtem den jembidang pai, "Tsükchirtem l o n g j e m d a k t s ü t s ü , a j u r u t e p d a k t s ü t s ü , jembidaktsütsü aser nüburtemi teimla anguba den külemi tesünep angutsü atema Vatican-i inyak arudar," ta ashi.

"Rara ya mepaidoktetba ka masü. Raraba hadirtem ola madokdaktsütsüla, kechiyong ibaji ajanga timtem kecha mebenteter saka tamajungba dang kümdaktsür. Puti otsü yanglurtemji timtem metsüh prokertem masü saka yimjung yanglurtem lir," ta pai ashi.

Amongnüa Pope Leo-i Ukraine nung teti atema yimjung alitsü, Gaza nung rara anentsü aser Hamas teloki pua aliba Israel nunger ajak chioktsü ayongzüka liasü.

Paisa India aser Pakistan na tsüngda rara anenba atema pelaba lemsatep.

ANOGO ABEN TSÜNGREM DEN

Tanen maka tetushi (T.Ken 47: 1-9)

Asenoki Tsüngrem tushibaji tanen maka tekülem lir. Asenoki iba ken ya onük balala asemsü nungi reprangtsü akok. Mezüngbuba, tesüiba otsü len nungi asenoki ibai reprangtsü akok. Hezekiai Sennacherib madak takok tulu anguba sayuba ken asem rong nung ibai ka lir (T.Ken 46-48). Kibubai Yihuda nunger asoshi kechi inyak? Pa alu (t. 1-4), atu (t.5) aser amen (t. 8,9). Ibai Kibubai asenok asoshi kechi inyak iba noksaji lir: Asenok temenen asoshi asütsü Pa alu, shia aru aser tang Kotak nung mena lir.

Asenoki ano iba ken tarutsü ainkar tsütsü nungi reprangtsü akok. Israel nunger Yakob timtem ajanga aotsüba liasü. Saka Yisu alu aser takok tulu angu (J.Adok 19), aser Israel Kibuba sentsüwangshia tushidaki aitsü. Tanü kin ajak ain adoker, saka tarutsü nung parnoki Pa tushitsü. Yisu arutsü aser pa yimli yangertsü aser Abraham dang nangzükba atalokdakja Pa nungi jakzükba jenti arentsü.

Mesüra iba ken tang mapa nungi reprangtsü akok. Tsüngrem külemba tetezü asen temulungjang nungi külemba aser tushiba ajak Pa nem agütsütsüba- Pa kechi lir ajak asoshi asenok kechi ajunga agi agizüktsüba. Iba ken yagi koda külemtsü ibaji sayur. Mezüngbuba, asenok tekülem teyongtsüji Tsüngrem lir (t.1). Asenok takoksang Tsüngrem külemer. Tanabuba, asenok tekülem nükjidongji Pa uludaktsütsüba (t.9). Asenoki Pa uluba tushitsüla. Tushibaji kuli asüba aser tekülem nung ajangshiba ka lir. Asenoki Kibuba ulutsüdi kechiaser asenoki Pa tushi dalang.

Tsüngrem tushiba nung mapang atakteta mali. Pa nüburi Pa tushir aser tushitsüla. Pa uluba ajungketsü asoshi asenoki Tsüngrem tushir. Nai Pa tushia külemer asü?

Indonesia nung Ngalik oshi nung Laishiba rangben meyipzükogo

May 15, 2025: Indonesia nung rangben meyipzükogo. Papua Province nung kibong ka 2018 küm nungi Papua province nung prangpong amertem tsüngda rarar aser nüchiso bushiba movement ajanga yimtenren tensa majjung aser meimchir temeden anema inyakba kanga bulua ataloker.

Indonesia ya alima nung Muslim nütsüng teimba aliba linük ka süaka Papua province nungbo nütsüng shilem 70 shi Khristantem lir.

Iba province nung Islam yimsü ajungkettsütsü nükjidong nung linük tesem balala nungi Muslim nungertem Papua-i oa alir.

Iba province nung Khristantem kangshia Islam yimsü dangi meyipdaktsüba aser meimchir temeden anema inyakba kanga bulua ataloker.

Tang Indonesia tesem ajaklen Khrista osangtajung kanga bulua prokba mapang nung Ngalik oshi nung Laishiba rangben meyipzükba ajanga ano Khristan nütsüng tali arentsü imlar.

Papua Province nung Khristantemi reshikangshi kanga ajangshiba mapang ka nung Ngalik oshi nung Laishiba

AO OSHI ANGAZÜKDAK:**TANÜ ANGAZÜKTSÜBA OJANG****Temtok**

(v) anak auyi endokba (dust off)

* Molok nung auyi aliba ajak temtoker aonsutsü ayu.

Temtok

(v) süng ama tatsüba küma lepdokba (cut off wood type material)

* Mechi talang asüba agi tatsüka temtok.



Tir Yimyim

OLONG PAITEP # 7152

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

- Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anügdang masü - (5)
14. Jabaso masü - (4)

OLONG PAITEP # 7151 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA

India team World Test Championship final-ibo mai saka 2023-25 WTC cycle nung tasembuba jenjang nung tembangba sülen parnoki senpet USD 1.44 million agizüktsü (sen crore 12.32 shi). International Cricket Council (ICC)-i Brehostibarnü taküm iba asayamung final atema senpet USD million 5.76 agütsütsüba sangdongogo, koba taoba edition ana dang nungi anasü agi timba asütsü. Taküm final ya Lord's nung Australia aser South Africa na asayatsü. WTC final akoker nem USD million 3.6 (crore 30.80) aser runners-up nem USD million 2.16 (crore 18.48) agütsütsü.

Meghalaya nung mezüngbuba govt. Engineering College amenoktsü

Shillong, Monupii/May 15 (Agencies): All India Council for Technical Education (AICTE)-i, Shillong Government College of Engineering amenoktsü atema temelaba agütsüogo, koba Meghalaya nung mezüngbuba sorkar engineering college asütsü.

2025 küm April 30 nü AICTE-i Principal Secretary of Education, Government of Meghalaya nem Letter of Approval (LoA) agüja liasü. Institution tasenba ya East Khasi Hills district nung Mawlai Kynton Massar nung amenoktsü aser North Eastern Hill University (NEHU), Shillong nung affiliate sür inyaksangshitsü.

College nem ano undergraduate programs ana; Civil Engineering aser Electrical Engineering amenoktsü temelaba agütsüogo aser 2025-26 academic session nung

kaketshir semermer agitettsü. State sorkar inyakyim kübok college nung Economically Weaker Sections (EWS) nungi candidate tem atema menden shilem 10 mekazüka toktsütsü.

Chief Minister Conrad K. Sangma-i iba osang ya X ajanga lemsatepogo. "Shillong Government College of Engineering nung Civil aser Electrical Engineering course tem tenzütsü asoshi AICTE-i Letter of Approval agütsüba agizükba pelashishia sangdongogo, koba state nung mezüngbuba sorkar engineering college asütsü," ta pai ashi.

AICTE tenüngdakbatem peritsü atema state sorkari infrastructure, qualified faculty, aser academic governance dak sendakba nung atakzükja aliba inyakyimtem peritsütsüla. Sorkari item tenüngdakbatem peritsütsü atema college nem senotsü peria agütsütsü sorkar sentong lir.

AICTE regulations nung shilem ka ama institution ya NEHU nung affiliate asütsüla mesüra temelaba meshitsüla aser university indang admission mapanglem sülen anidaktsüla.

Council-i, lateta aliba menden dak alia admission magitsü tenokdangba agütsüogo. Aibelenra AICTE inyakyim dak ajemdaker merenshitsü.

Iba den bendenloksema council-i, AICTE nungi temelaba maig-i technical course tem atema India mesüra bendanger university tem den longjmer minyaksü college nem tenükdangba agütsüogo.

Maneni AICTE-i college dang Smart India Hackathon, ATAL Faculty Development Programs, aser Pragati, Saksham, aser Swanath amala scholarship schemes tem amala national program tem nung shilem agitsü ajungshia liasü.

Mizoram CM-i Sairang nung bamboo processing unit ka semzüksütsü

Aizawl, Monupii/May 15 (Agencies): Mizoram Chief Minister Lalduhoma-i Bodhbarnü Aizawl anasa Sairang nung state indang horticulture centre nung sen crore 2.52 alang bamboo processing unit ka semzüksütsü.

Iba unit nung bamboo treatment & seasoning plant ka, bamboo depot aser warehouse ka aser activated charcoal facility ka densema lir. Iba unit ya National Bamboo Mission kübok amenokogo.

Sentong nung o jembiba mapang, CM-i iba inyakyim ya Mizoram nung bamboo-based industrial terenlok asoshi tongtibang jenjang ka agiba lir ta ashi. Paisa, state nung aliba nüburtemi bamboo ya kanga junga aser sustainably amshitetsü, ta ashi.

"Processing renloka aoba sülen au ya state rongsenketzüng nung kanga tongtibang akümtsü aser iba ajanga mapa aika

adokdaktsütsü," ta chief minister-i ashi.

Paisa, au ta takaratiba ainer asünung charcoal yanglutsü atema sung melena iba ya amshiba tajungba asütsü, ta ashi. Au agi charcoal yangluba ajanga arem wazüka ayuba nung teyari agütsütsü aser tzümopunga kangabo meraksatsütsü, ta CM-i ashi.

Kasa mapang nung Horticulture Minister C. Lalsawivunga-i ashiba agi, unit tasen ka amenokba sülen Mizoram nung bamboo processing dak sendakba nung putu tasen ka tenzükogo.

Technical report agütsüba mapang Director of the Horticulture Department and Mission Director of the State Bamboo Mission C. H. Lalmuanpuia-i, bamboo treatment aser seasoning plant ajanga au indang utility aser durability taliba kümdaktsütsü koba küm 50 tashi amshitetsü, ta ashi.

Paisa, bamboo depot aser

godown ya storage aser supply facilities kanga tongtibang ka asütsü. Activated charcoal unit yagi anogoshia charcoal tone 3 adokdaktsütsü koba küm nungbo tone 900 shi asütsü.

Iba facility inyaksangshitsü atema anogoshia au 670 clum nungdaktsü. Iba den bendenloksema iba yagi anogoshia vinegar liter 100 shi adokdaktsütsü aser iba nungyagi refined vinegar liter 54 adokdaktsütsü.

Ketdangsürtemi Serchhip district kübok Chhingchhip aser Baktawng yimtsüng aser Mamit district kübok Saiphal yimtsüng nung unit tasenba nem raw materials agütsütsü atema bamboo clusters asem amenokogo.

North East Cane and Bamboo Development Council (NECBDC)-i item project tem atema technical support agütsüdar. Ketdangsürtemi ashiba agi, council-i inyakyim takok ngua aotsü atema training agütsütsü.

Manipur nung telok balala nungi telungpur 6 apu

Imphal, Monupii/May 15 (Agencies): Manipur police aser central security force temi tesem balala longbanga yur meita aoba mapang telungpur telok balala nungi züngsem trok puogo.

Ketdangsürtemi pistol ana, injang, kuli kaket balala aser communication device 6 parnok ket nungi nguteta liasü.

Ketdangsürtemi ashiba agi, telungpurtem ya taoba ghonda 36 tsüngda Thoubal, Kakching, Bishnupur, aser Imphal West district tem nung puogo.

Sepaitemi pua aliba telungpurtem ya rakzükrakdemba nung densema

liasü. Parnoki Manipur kübok lenden aliba tesem balala nung cargo agency, sorkar office tem, mapa inyaktertem, bank, aser educational institute tem nungi sen sarua liasü.

Ketdangsürtemi Revolutionary People's Front indang armed wing People's Liberation Army züngsem RK Mubisana Meitei (47) aser Moirangthem Naresh (28) na Nongpok Sekmai-PS, Thoubal District kübok Leirongthel Prita tesem nung apu.

Security force temisa, United National Liberation Front (Koireng) züngsem Asem Nanao (31) aser Waikhom

Rajesh (32) na puogo. Tena ya Bishnupur aser Kakching district tem nung apu.

Maneni parnoki UNLF (Pambei) volunteer Waikhom Rajesh (32), Imphal West district kübok Minuthong tesem nung apu.

Bodhbarnü Kakching district kübok Waikhong tesem tatemangbuba meita aoba mapang Kangleipak Communist Party (Taibangannba) züngsem Kakchingtabam Rishikesh (41) pua liasü.

Sepaitemi apuba telungpurtem ya ken o dak sendaka aliba police station tem nem bendanga agütsüogo.

Trump-i amokmerenba nung onok tsüboa mali: Pezeshkian



Masoud Pezeshkian

Tehran, Monupii/May 15 (Agencies): United States Tir Donald Trump-i tang anogo asem asoshi Gulf linüktem semdanga jajaba mapang Tehran aija amokmerenba nung ozü linük tetsübo agi mapudaktsü, ta Iran Tir Masoud Pezeshkian-i ashi.

"Pai (Trump) yangi arua, yimyim ayima aser onok tsübodaktsütsü amai bilemer. Onok asoshibo yipten nung asüba dang nungi pei tamangba mechi asüba tanangba. Na onok tsübodaktsütsü aru? Amokmeren kecha matsüngdang onok mapudaktsü," ta pai Bodhbarnü ashiba state TV nung live sayua liasü.

Riyadh nung GCC senden amenba mapang Trump-i Iran den tezüngzüktep ka yangluner saka parnoki (Iran) kiralongrar yariba aser proxy wars

anentsüla, teti asoshi nuclear nok-nü bushiba maparen jangja-jangja yutsütsüla, ta shia liasü. Tehran indang nuclear sentong atema tezüngzüktep ka yanglutsü asoshi Oman tetsüngtai ia Washington aser Tehran tsüngta senden pezüben menogo.

Bodhbarnü Qatar yimtiba Doha nung state dinner ka nung adendang Trump-i Iran indang nuclear programme atema yimjung pangzüng ka renemner ta yimjak nung shia aliba nenshia liasü aser aji inyaktsü Tehran dak keta lir ta ashi.

"Tensa kangasa majung, aser onoki mapa shidak inyakner. Nisung million aika takum kumzüksüsa mapa kar inyakner. Kechiaser iba amala tenzükbaji mazüokteter," ta Trump-i ashi.

Mongulbarnüa Trump-i Iran

den tezüngzüktep ka yangluner saka Iran leniri iba olive kongsang magizükra onoki tashi ajak amshia ajungshitsüba dak alaka danga lenmang mali ta shia liasü.

Ni Iran ket nung nuclear nok-nü alitsü memelatsü, ta paisha ashi.

US administration balalai Iran ya nuclear nok-nü yangluba nungi nokdangtsü meranga aru. Barack Obama administration mapang alima nung tashi tait linüktemi kanga meranger 2015 nung Joint Comprehensive Plan of Action (JCPOA) nüngja agütsür agreement ka yanglua tembang.

Saka Trump-i US tir ka ama Obama melenzükbaji mapang pai pasasa US ya 2018 küm nuclear agreement nungi ainshia iba tezüngzüktep laodaktsü.

Iba ken o tang tejembidak süaka Trump administration-i maneni Iran nem sanctions agütsür.

Iran-i par linük nung ballistic missiles atema oset yanglutsü merangba nung tenük yoker US-i sanctions agütsüogo, ta US Department of the Treasury ajanga Bodhbarnü shia liasü.

Item sanctions yagi nisung trok aser entities 12 nem agütsü aser item yagi Tehran indang ballistic missile program asoshi nüngdakba tongtipang oset yangluba nung Iran yimli yariba nung shilem agia lir, ta Treasury Department ajanga ashi.

Gaza south len tayimtsü amshia amakdang nisung 54 tepset

Gaza City, Monupii/May 15 (Agencies): Gaza south tsütsü Khan Younis yimti nung yasüng tayimtsü amshia amakdang nisung 50 dak tema tepset.

Khan Younis nung Associated Press cameraman ajanga iba yimti nung Bodhbar aonung nungi Brehostibar anepdang tashi tayimtsü amshia 10 ben amakba züngdangtet aser iba yimti nung aliba Nasser Hospital nung aliba morgue bushia tasü mang aika bener aoba angu. Nisung tasü mang karbo shilem balala, aser tasü mang alepba juli nung nisung balala temang shilem bener mozü kidangi aru. Iba mozüki indang morgue yagi nisung 54 tepsetogo ta tejangja ashi.

Asürtem rongnung Qatari television network Al Araby TV atema inyaker osangbener ka densema liasü ta network ajanga social media nung sangdong aser Hasan Samour ya par kibong nungi züngsem 11 den külemi Khan Younis nung amakdang tepset ta ashi. Israel mitkari iba yimti nung amakba indang sangdong kecha agüja mali.

Ibai ammag anabuba kanga sashia bomb pokloktür alitsü, kechiaser Bodhbar aonunga Gaza northern aser southern tsütsü tayimtsü amshia amakba nung tanur 20 jungnüa densema nisung 70 shi tepseta liasü.

US Tir Donald Trump-i Middle East nung Israel masü Gulf linüktem semdangba mapang iba ya ataloker. Trump-i iba region semdangba ajanga ceasefire tezüngzüktep ka yanglutsü mesüra Gaza telungi humanitarian aid asendenshi yoktsü südi ta tesem balala nung teimla liasü. Israel-i iba linük mokdang ita asem buba nung lir.

Hamas telungpur samatsütsü nükjidong nung Israel-i Gaza Strip amakba tesashiba kumdaktsütsü nangzüka aliba ama inyaktsü, ta Israel Ato Kilonser Benjamin Netanyahu-i hopta tetenzüklen shia liasü.

"Mission renemtsü asoshi Israel sepaitem tashi tulu bener Gaza telungi aitsü anogo ishika dang lir ta ato kilonseri ashir," ta Netanyahu indang office ajanga Mongulbarnü sangdong

ka nung shia liasü.

International rights group Human Rights Watch ajanga, Israel-i Gaza makdoka nisung meyirijang aika tesem balalai prokshidaktsütsüba sentong ataloktsü anameta nung lir ta Brehostibarnü ashi aser linük balala dang iba anema ola adoktsü ayongzüka liasü.

Hamas-i aniba telungpur telok temi October 7, 2023 nü Israel south tsütsü nungpoka oa nisung 1,200 tepsetba sülen iba rara ya tenzü. Israel-i tayang kepzüka amakba nung Palestine nung 53,000 jungnüa tepsetogo aser parnok ya aika tetsür aser tanurtem lir, ta Gaza indang Health Ministry ajanga ashir. March 18 nü Israel-i ceasefire raksaba sülen nisung 3,000 jungnüa tepsetogo, ta ministry ajanga ashir.

Hamas-i October 7 nü Israel amakdang nisung 250 shi pua bener aoba nungi tang tashi nisung 58 mechioki yua lir aser item rongnung nisung 23 takum lir ta amanger, ajisüaka Israel ketdangsüri nisung asem asoshi tebilemstü lemsatepogo.



OFFICE OF THE
DIBUIA VILLAGE COUNCIL
P.O. Mangkolemba, Dist. Mokokchung - 798601,
Nagaland.

TENÜNGSANG AGÜTSÜR
Office of the DIBUIA VILLAGE COUNCIL ajanga tsünglanglen agüja alirtem nem tenüngsang aser tetushi agütsür:-

- Kr. Alemtula Longchar**, D/o Wb. Imsuyanger Ao & Wt. Temsumongla, HSLC Examination 2025 nung Little Flower Higher Secondary School, Kohima nungi Top 8 jenjang ngutet.
- Sp. Tsungrochung Walling**, S/o Wb. S. Moatemsu Walling & Wt. Narojungla, HSLC Examination 2025 nung Christian Higher Secondary School, Dimapur nungi Top 12 jenjang ngutet
- Sp. Imtitongzuk**, S/o Wb. Ungerchang & Wt. Moarenla, HSSLC (Science stream) Examination 2025 nung Holy Cross Higher Secondary School, Dimapur nungi Top 10 jenjang ngutetba.
- Kr. Mendila Pongen**, D/o Wb. R. Temjenmongba Pongen & Wt. Supongmerenla, SCERT kübok Lecturer Mathematics mapa anguba.
- Kr. Moainla**, D/o Wb. Tongpangyungdang & Wt. Sentisangla, SCERT kübok Graduate Teacher mapa anguba.
- Dr. Limasanen Longchar**, S/o Wb. T. Yongdang Longchar & Wt. Imkongyala, thesis "Juvenile teens' marriage among plain Karbi DABA mission field in Nagaon district of Assam: pastoral response" kübok Doctor of Ministry renemba.
- Dr. Moatula Jamir**, W/o Dr. Limakumba Walling, Department of Statistics, Guwahati University, Guwahati, Assam nung Associate Professor, Population Research Centre shimba.
- Dr. Imlimar Pongen**, S/o Lt. Mr. Longrimeta Pongen & Lt. Twasen Imchen, thesis "Embracing the 'other' as created in the image of God in the context of violence in India" nung Sam Hugginbottom University of Agriculture, Technology & Sciences, Gospel and Plough Institute of Theology, Allahabad, UP, India nungi Doctor of Philosophy (Ph.D) in Christian theology degree anguba.
- Wt. Tianungla Longkumer**, W/o Wb. Nungsangwaba Pongen, Deputy Director, School Education, Nagaland jenjangi ajungketba.
- Dr. Tekapong**, S/o Lt. Mr. Bendangwati Longkumer & Wt. Kilenkala Pongen, NEIGRIHMS, Shillong nungi MBBS renemba.

Maneni Dibuia Government High School ajanga HSLC Examinations 2022 nungi 2025 tsüngta tanen makai pass percentage 100 yutetba asoshi Council ajanga tenüngsang agütsür aser nisung ajak pei wadang nung takokba liang ta moatsür.

**Sd/-
Moasunep
(Secretary)
Dibuia Village Council**

**Sd/-
Limatemsu
(Chairman)
Dibuia Village Council**

PUBLIC NOTICE

Shri. H. Kughaho Zhimomi-i Gurgaon Haryana nung Gurgaon Sector 103, Spire Woods, Flat no. T-3/0604 (Customer ID S0153) tasazük1811 sq.ft. ownership ya Mr. KESANG BHOTIA, son of Late. Prabhu Singh Bhotia nem agütsütsü tebilemba lir ta nüburtem dang metetdaktsür. Nisung kari danga iba property kibur melenba nung ashishitsü lira tezüluba nung kibur nem iba sangdong agütsür anogo 30 tsüngta agütsütsü metetdaktsür.

Mapang atakzüka yutsüba nung ashishiba melira iba ki o jen kibur melenba mulunga agizüker ta züngshitsü. Kibur memelendang aruba tashishitsü ajunga ki kiburi kanga junga asadangtsü.

Iba sangdong dak sendakba nung osang tali tejangjaba metetener temi tsünglanglen agüja aliba nung tongtepratepsü akok.

Sincerely,
Gaurav Avasthi
CRM (9811211439)
crm@alphacorp.in
Alpha Corp Development Ltd.
602, 6th Floor, Tower J, World Trade Centre,
Ring Road, Nauroji Nagar, New Delhi-110029.

Russia o Ukraine yimjung ken o jembitsü melen kati ka aitsüteper

Ankara, Monupii/May 15 (Agencies): Ukraine nung küm asem maneni raraba mapang yimjung asoshi jembishinütsü atema Tir Volodymyr Zelenskyy-i aniba Ukrainian delegation ka aser Russian delegation ka Brehostibarnü Turkey tonga aruogo.

Linük ana ya langpang ka nung mener jembishinütsü liaka, Russia-i Ukraine anüdoklen yimtsüng ana amokbangogo ta Brehostibarnü ashi.

Jembishinü metenzükdanga o agi raraba manener, aser Russia Tir Vladimir Putin jembishinütsü atema Turkey arutsü melen "decorative" delegation ang yok

ta Ukraine Tir Zelenskyy-i aitsü. "Parnok sasa telemtetba kecha agitetsü asü masüar asenoki Russian delegation janjang aser par taginüba angatetsü nüngdaker. Ni ajitetba agibo parnok ya 'dummy' ang mesüker," ta Zelenskyy-i airport tonga aruba sülen ashi.

Russia-ia kanga kera telangzüba agüja Zelenskyy ya "clown" aser "loser" ka lir ta ashi. "Shibai 'dummy' ojang amshir? Clown? Loser? Education maliba nisungi amshir," ta Russian foreign ministry odongtar Maria Zakharova-i Moscow nungi osangbener dang ashi.

(Maneni tapak 8 nung...)

PL player of the season atema Liverpool nungi asayar 3 nominate süogo

Monupii/May 15, 2025 (Agencies): English Premier League akokba Liverpool team nungi asayar asem Premier League's player of the season award atem nominate süogo.

Liverpool-i league 20buba akokba nung teyari agütsüba sülen Virgil van Dijk, Mohamed Salah, aser Ryan Gravenberch nunger player of the season award atema asayar ti shimba nung densema lir.

Tang asaya aliba season nung captain Van Dijk Liverpool atema asaya ajak nung

asayaogo aser par team-i asayar 14 tashi goal ka danga mechi-i asayaba nung teyari agüja liasü. Midfielder Gravenberch-a asaya ka nung dang masaya.

Kasa mapang nung Salah-i goal 46 idaktsüba nung shilem agiogo, kong pai goal 28 idaktsüba densema lir.

Club tem rongnung Nottingham Forest nungi dang asayar ana nominate süogo. Morgan Gibbs-White aser Chris Wood na iba naroküm atema nominate süogo. Wood-i asaya

34 nung goal 20 idakja liasü.

Ano nominate asürtem rongnung Newcastle nungi asayar Alexander Isak densema lir, shibai goal 23 idaktsü aser ano Brentford nungi asayar Bryan Mbeumo-a nominate süogo. Pai goal 18 idaktsüba den goal tenet assist süja liasü.

List nung tatemangbubaji Arsenal midfielder Declan Rice lir. Nüburtemi vote agütsüba den football experts panel kati vote agütsüba sülen takoker jangjatsü, koba taruba hopta sangdongtsü.

Neeraj Chopra May 23 nü Poland nung tokteptsü

Monupii/May 15, 2025 (Agencies): Taruba hopta Bengaluru nung asayatsü aliba NC Classic thinenba sülen India nunger nüngtugu javelin throw asayar Neeraj Chopra May 23 nü Chorzow, Poland nung 71buba ORLEN Janusz Kusoci?ski Memorial event nung asayatsü.

Chopra ya May 24 nü NC Classic nung India nunger aser alima nung asayar tajungtem den asayatsü liasü, saka India aser Pakistan na tsüngda mangatettep adoka tensa mejungi akümba sülen iba asayamung ya thinenbäsa aküm.

Chorzow nung Neeraj Chopra, Grenada nunger world championship anaben bener alisang aser Paris Olympics bronze medallist Anderson Peters, Germany nunger asayar Julian Weber, Poland nunger asayar Marcin Krukowski aser Cyprian Mrzyglod o Dawid Wegner na densema tanga



Poland nunger asayatem den tokteptsü.

Poland nung asayatsü aliba asayamung ya Chopra atema iba season tasembuba asayamung asütsü. Pa South Africa nung mezüng asaya liasü. Pa May 16 nü Doha Diamond League nung asayatsü, kong pai 2023 küm asaya akok aser 2024 küm tanabuba jenjang nung tembanga liasü.

Peters ya Doha nunga Chopra den tokteptsü. Pa Germany nunger 2016 Olympics gold medalist Thomas Rohler aser Kenya nunger 2015

world champion Julius Yego nunger den NC Classic nunga asayatsü liasü.

ORLEN Janusz Kusocinski Memorial ya World Athletics Continental Tour silver event ka lir. Iba ya Poland nung track aser field asayamung tejentiba aser Europe nunga asayamung rongnung tejentiba ka lir.

1954 küm mezügbuba asayaba sülen kümtem tsüngda iba asayamung nung alima nung track aser field asayar tajungtem aikati shilem agiogo.

Chopra-i taküm kanga junga asaya tenzüka Potchefstroom, South Africa nung April 12 nü World Athletics Continental Tour Challenger competition Potch Invitational Track event nung pai takok angu.

Pa ano June 24 nü Ostrava, Czech Republic nung Golden Spike 2025 athletics meet nunga shilem agitsü lir. Pa yiruba ajanga iba asayamung nung taoba mapang anaben tashi masayateti liasü.

Buttler IPL play-offs nung masayatsü



Monupii/May 15, 2025 (Agencies): Gujarat Titans pur Indian Premier League play-offs atema qualify asüyonga Jos Buttler masayatsü, kechiyong pa England team nungi West Indies den one-day aser T20 asayamung nung asayatsü lir.

Toba England team captain ya England one-day squad nung züngoksema aliba IPL asayar pongu rongnung ka lir.

India aser Pakistan na mangatettep adoka tensa mejungi akümba ajanga IPL thinenbäsa akümba sülen IPL aser England indang

asayamung na denchiteptsüsa aküm.

IPL ya taruba Honibarnü nungi tenzükhitsü. Play-offs ya May 29 nü tenzüksü aser final June 3 nü asayatsü.

Wicketkeeper Buttler ya group stage tembanga asayatsü atema India-i arutsü saka iba sülen May 29 nü nungi West Indies den ODI asayatsü atema meyipa aotsü.

Royal Challengers Bengaluru aser Mumbai Indians nungi asayar all-rounders Jacob Bethell aser Will Jacks nata kasaji asütsü imlar.

England indang ODI squad nung densema aliba IPL asayatem rongnung Jofra Archer aser Jamie Overton nata densema lir, saka tenabo India-i meyipa marutsü, kechiyong parnok asayaba team tem play-offs atema qualify asütsü timla mali.

England aser West Indies na ODI asem asayatsü aser iba sülen June 6 nü nungi tenzüka

T20 asem asayatsü.

Asaya asem asayatsü anunga lia Titans pur tang IPL nung temaba jenjang nung lir aser parnok play-off-i aitsü atema asaya ka dang akoktsü nüngdaker.

Titans nung Buttler melenä Sri Lanka nunger batter Kusal Mendis shimtsü imlar. Parnok tatemangbuba group asayaji May 25 nü asayatsü.

Tanabuba jenjang nung aliba Royal Challengers pura asaya asem anunga lia qualify asütsü atema asaya ka dang akoktsü nüngdaker.

England all-rounder Liam Livingstone aser wicketkeeper Phil Salt na IPL tenzükhitsü atema RCB-i meyipa aruogo.

Livingstone England team nung mali aser Salt T20 squad nung dang densema lir.

Jos Buttler melenä Harry Brook captain asütsü shimba sülen England team tang mezügbuba ODI asayamung ka asayatsü lir.

DC-i Fraser melenä Mustafizur Rahman shimogo



Monupii/May 15, 2025 (Agencies): Delhi Capitals-i Australia nunger opener Jake Fraser-McGurk melenä Bangladesh nunger left-arm pacer Mustafizur Rahman shimogo. Fraser-i jurila nüngdak kar aliba ajanga IPL nung tanungba asayatem nung shilem magitsü telemtetba agiogo.

Mustafizur, shiba taoba mapang 2022 aser 2023 küm DC nungi asayaogo, pa sen crore 6 yong team-i meyipa aruogo.

Ajisüaka pa asayatsü ano mejangjai lir, kechiyong Bangladesh Cricket Board (BCB)-i ashiba agi pa atema No-Objection Certificate (NOC) magütsü lir.

"Pa UAE nung oa asayatsü aliba T20 asayamung atema national team nung züngoksema lir," ta BCB CEO Nizamuddin Chowdhury-i Cricbuzz dang ashi.

Bangladesh team May 17

aser 19 nü UAE den asaya ana asayatsü lir aser iba ajanga Mustafizur IPL nung asayatsü asoshi tetsükdaktsü adokdaktsür.

Mustafizur ya mezüng 2016 küm Sunrisers Hyderabad nung asaya, kong pai Emerging Player award ngua liasü. IPL asaya 57 nung pai wicket 61 agir lir aser international T20I asaya nung pai asaya 106 nung wicket 132 agir lir.

Pa nem temelaba agütsüra pa Mitchell Starc aser T Natarajan den külemi asayatsü, ajisüaka osang ajanga ashiba agi, Starc taküm atemabo ojang dang asayatsü.

Delhi Capitals pur GT, MI, aser PBKS den tongtibang asaya asem asayatsü lir aser parnok playoff-i aitsü timla lir. Parnok tang table nung pongububa nung lir aser parnoki top four nung aliba team tem point ka agi dang memenepli lir.

BENDANGLI OSANG : Tapak 7 nungi...

Russia o Ukraine yimjung ken o...

Russian delegation ya Tir Putin den teyariteper tajung Vladimir Medinsky-i anir lir, kong ano ketdangsür asem dena lir, ta Kremlin ajanga ashir. Iba den ano Istanbul nung yimjung asoshi jembishinütsü atema Putin-i junior-level ketdangsür pezü shima lir.

Zelenskyy-i iba rara tembangtsü asoshi jembishinütsü atema yimjak nung Putin dang Turkey nung ajuruteptsü ayongzüka lir. Zelenskyy-i pa Turkey-i aotsü aser Putin aruba atatsü ta shia lir.

Ajisüaka jembishinü nung Putin madenba yagi ni maoksar, ta US Tir Donald Trump-i ashi. Taoba mapang Trump-i lenir ana dang tejak o tejak jitepa senden amentsü ayongzüka liasü, saka Putin maliba ajanga pa kangabo maoksar amai ajiteter.

"Ni yangji melira Putin aotsü tamakoktsü ta ni bilema liasü,"

ta Trump-i Doha nungi osangbener dang ashi.

Ukraine ketdangsür temi ashiba agi Zelenskyy ya Putin kisüng ajurutsü temlungtetba nung lir aser langpang nung Putin kisüng den amentsü. Ukraine aser Russian delegation ya kong aser kodang ajurutepa jembishinü akatsüar mejangja, saka Zelenskyy-i Turkey Tir Recep Tayyip Erdogan ajuruba sülen ang tejangjaba metettsü imlar.

Jembishinü tenzüksü asoshi Ukraine aser par European allies temi Russia dang anogo 30 ceasefire agizüksü ayongzüka liasü. Kremlin-i aji magizük saka linük ana tsüngta indang indanga jembitsü ang ashi. Russian ketdangsür temi Brehostibarnü jembishinüba ya rara tenzüker 2022 küm tetenzüklen Istanbul nung jembishinüba tenzükhshir ama ashir, koba terenlok makai anenadok.

BIEMDANGANG

"Chiyongtsü anganüsangji nü tembar süra, na tezülen mena aliyonga atatsü".